

LETTRE

DE
MONSIEVR LE DVC
DE MAYENNE,

AV ROY.

*Avec la responce à icelle par sa
Maiesté.*

Az redoublé.



A PARIS,
Chez FED. MOREL, & P. METTAYER,
Imprimeurs ordinaires du Roy.

M. DC. XVII.

Avec privilege de sa Maiesté.

Case


F

39

.326

1617 Ly

THE NEWBERRY
LIBRARY



LETTRE DE MONSIEVR
le Duc de Mayenne au Roy.



SIRE,

I'enuoye Monsieur le Baron de Linieres à vostre Majesté, pour la supplier tres-humblement de vouloir ouyr mes iustes calamitez, esperant qu'elle me fera l'honneur de les recevoir fauorablement, & que sa bonté sera touchée du iuste


ressentiment que j'ay des violentes entreprises faictes sur ma vie, & les places de mon Gouvernement, donnees à feu mon pere, non pour satisfaction ny recompense, mais pour marque & gage honorable de sa fidelité & conduite, estimée par tous les bons François dans les guerres ciuiles, ayant conserué vostre Estat en son entier contre les desseins estrangers, sans en souffrir aucun desmembrement.

I'espere d'auantage, SIRE, que vostre Majesté par sa bonté & prudence, necessaire en telle occasion, fera faire chastiment exemplaire de celuy ou ceux qui ont meschamment, à prix d'argent, tramé & conduit ce mauvais dessein, mesmes de celuy qui vouloit en estre l'executeur. Ce proceder, SIRE, de rair la vie de vos sujets, & de ceux qui ont l'honneur de tenir des premiers rangs & principales charges de vostre Royaume,

qui ne tesmoignent par leurs paroles, actions & deportemens, que toute obeyssance, qui ne respirent que vostre seruice particulier, & le bien de vostre Estat, qui volontairement pour ceder au temps & aux conseils violens, se sont voulus bannir de la France, acceptans les propositions qui leur ont esté faictes des voyages aux pays estrangers, qui pour le respect qu'ils portent à vos commandemens, ont oublié toutes iniures & calomnies qu'ils ont receu de vos Ministres; bref, qui ne cherchent que du repos en leur vie dans l'innocence de leurs actions; ne se peut nommer autrement qu'une persecution insupportable & inouïe dans vostre Royaume, qui passe plus auant que la vengeance que l'on peut rechercher contre les particuliers. A quoy ie supplie tres-humblement vostre Majesté d'auoir quelque esgard, puis que c'est le deuoir de ceux qui sont interessez en la conseruation de vostre personne, & de vostre Estat, de vous en donner aduis; & ma plainte estant appuyee des loix diuines & humaines, m'a faict esperer que vostre Majesté la receura avecques la mesme bonté qu'elle a accoustumé de tesmoigner à tous ses subiects en leurs iustes requestes: Et qu'elle me fera l'honneur de croire qu'aucunes sortes de persecutiōs ne me pourront iamais faire changer la resolution que i'ay prise de tesmoigner par toutes mes actions le tres-humble seruice que ie dois à vostre Majesté. A quoy ie n'esparagneray mon sang & ma vie, croyant aussi que vostre Majesté aura plus agreable de la voir finir de ceste sorte, que par de si mauuais moyens. Estant, SIRE, de vostre Majesté, tres-humble, tres-obeyssant, & tres-fidelle seruiteur & subiect,

M A Y E N N E.

De Soissons ce II. Ianuier 1617.



LETTRE DV ROY A
Monsieur le Duc de Mayenne.



ON Cousin, j'ay veu par vostre lettre de l'vnzième de ce mois, & entendu par le sieur Baron de Linieres la plainte que vous faites de ce qu'on a voulu attenter à vostre vie. Sur quoy ie vous diray que la conseruation de mes subjects m'est si chere, & particulièrement de ceux qui tiennent en mon Royaume le rang que vous y auez, que si vous contribuez autant de vostre part, comme ie feray de la mienne, pour vous faire auoir raison de ce crime, vous en receurez sans doute le contentement que vous en pouuez esperer. Vous le croirez aisément, ie m'assure, quand vous verrez que mon Parlement (qui rend la Iustice à tout le monde, & a l'interest des Pairs en singuliere recommandation) en prend cognoissance: Et ce avec tant de soin, qu'il a desia ordonné que le procez sera faict & parfaict à l'accusé, au lieu où vous estes, & qu'estant iugé, il luy soit amené, afin que s'il est trouué coupable de ce dont il est chargé, il recoiue la peine & le supplice deu à l'enormité d'une si detestable entreprise. Ce qui sera indubitablement si vous le voulez, rien ne l'en pouuant garentir que sa fuitte, qu'il vous est aisé d'empescher, puis qu'il est en vos mains, & qu'il n'y a chose plus facile que de le ren-

dre feurement en ceste ville, où non seulement ie le feray chastier comme il merite; mais en outre ceux qui se trouueront l'auoir suscité à vn si pernicieux dessein: la raison voulant que les authéurs des crimes portent au moins la mesme peine que ceux qui les doiuent exécuter.

Ie ne souffriray iamais qu'en mon Estat on pratique impunément telles meschancetez. Ie permettray aussi peu qu'on entreprenne sur les places que me gardent mes subiets & mes seruiteurs, que sur leurs vies. C'est pourquoy demeurant dans les bornes de vostre deuoir, vous pouuez vous asseurer que rien ne vous conseruera plus feurement les villes (qui ont autrefois esté consignées entre les mains de feu mon Cousin le Duc de Mayenne vostre Pere) que mon autorité.

Ie ne réspons point à la façon par laquelle vous me tesmoignez qu'il les a eues, l'integrité de ses dernieres actions m'obligeant de perdre la memoire des premieres qu'il a beaucoup de fois condamnées luy mesme, le cours de sa vie ayant esté tel depuis la fin des troubles de la Ligue, que si vn Souuerain peut deuoir quelque chose à son subiet, ie confesse luy estre redeuable, particulièrement en consideration de ses dernieres paroles, par lesquelles il vous recommanda & commanda plusieurs fois de viure & mourir en mon obeyssance.

Vous vous plaignez de la violence de ceux à qui ie donne part au maniemment de mes affaires: ie m'en estonne grandement, puis qu'il n'y a personne qui ne doiue recognoistre qu'en suiuant leurs aduis, i'ay iusques icy donné à mes subiets tant de subiet d'actions de graces pour ma cleméce, qu'à peine en trouuera-on vn seul en mon Royaume qui avec quelque apparence se puisse plaindre de ma rigueur, que ie puis dire n'a-

noir iamais exercée que contre moy-mesme , ayant esté trop indulgent à l'endroict de ceux enuers qui selon Dieu & selon le monde ie pouuois vsfer de feuerité.

Vous me mandez que pour ceder au temps , vous auez voulu vous bannir de mon Royaume ; acceptant les propositions qu'on vous auoit faictes d'en sortir. Sur cela ie n'ay rien à vous dire , sinon que l'affection que i'ay pour mes subjets , & particulierement pour ceux qui sont de vostre qualité , me les faisant plus desirer aupres de moy qu'en aucun autre lieu que ce puisse estre , ie ne vous eusse iamais permis le voyage dont vous parlez , s'il ne m'eust esté proposé , comme vous sçauiez , à vostre instante priere & supplication , & si ie n'eusse estimé vous rendre vn tesmoignage signalé de ma bonne volonté , en vous l'accordant.

Au reste , ie vous prie de croire que les persecutions (pour vsfer de vos termes) ne seront iamais telles en cet Estat qu'elles en puissent chasser personne ; me sentant par la grace de Dieu maintenant assez fort , pour executer la resolution que i'ay prise de ne souffrir qu'aucun de mes subjets en persecute d'autres : & faisant estat de viure avec tant de bonté , que ie ne doute point que chacun à mon exemple ne se tienne en son deuoir , m'exemptant par ce moyen d'auoir recours à ma puissance pour les y contraindre.

Les tesmoignages que vous me rendez par vostre lettre de desirer chercher vostre repos dans l'innocence de vos actions , me resioüiroient grandement , si vos effets ne sembloient cōtreuenir à vos paroles : ne pouuant conceuoir que l'innocence puisse compatir avec les intelligences & pratiques qui sont tous les iours entre vous & ceux qui veulent troubler le repos de mon Estat ; avec les leues de gens de guerre que vous

avez faites depuis peu pour grossir vos garnisons, non seulement sans ma permission, mais contre ma volonté: avec le refus de recevoir mon Lieutenant general de Soissons en la ville où sa charge l'oblige de résider, le bannissant de sa demeure au mespris de mon autorité, sans autre subiet que celui de l'affection qu'il a au bien de mon service, & sans avoir esgard aux prières & commandemens que ie vous ay faictz plusieurs fois de le restablir.

Je ne sçay pas ce que vous tiendrez pour crime, si vous appelez telles actions innocentes. Il n'y a personne despouillé d'intérêt & de passion qui ne les iuge du tout contraires aux loix diuines & humaines, que ie seray tousiours aussi soigneux d'observer, comme de les faire garder aux autres.

C'est ce qui me faict souhaitter que vous vous teniez veritablement dans les termes des protestations que vous me faictes, afin que ie puisse sans peine maintenir la paix en cet Estat, pour la continuation de laquelle ie suis resolu d'employer mon propre sang, tenant à bon-heur & à gloire de la conseruer à mon peuple, au mesme prix que le feu Roy, mon tres-honoré seigneur & pere, luy aacquise.

Par là vous cognoistrez la sincerité de mes intentions, que ie vous coniure de seconder de si bons effets, que vous puissiez vn iour, non auoir regret de m'auoir troublé aux desseins aduantageux que j'ay pour ce Royaume, mais vous preualoir de n'auoir pas peu contribué pour les faire reüssir. Je prie Dieu, mon Cousin, qu'il vous en face la grace, & vous tienne en sa sainte garde. Escrit à Paris, ce dix-septiesme Ianuier 1617.

LOVIS.

DE RICHELIEU.